

P R A E F A T I O.

JAMDUDUM Supremus Galliæ SENATUS
perspexerat, vitandis capitalibus apud Phar-
macopœos erroribus, adeoque civium principis
hujus Urbis securitati stabiliendæ, necessarium
esse Dispensatorium institui *, quo FACULTAS
Medica Parisiensis parandorum medicamento-
rum formulas præscriberet.

Nec profectò FACULTAS, quæ Urbis &
Orbis incolarum saluti prospicere nunquam de-
finit, suo defuerat officio; atque Codicem con-
dendo Medicamentarium, eumque typis vul-
gando, studium suum erga sibi concreditam
Hominum valetudinem longè ante sæculum
consecraverat.

CUM enim animadvertissent Medici Pari-
sienses medicamenta, quæ uno & eodem nomi-

* Vide Supremi Senatûs Parisiensis Placita, po-
stulante Illustr. Regis Procuratore Catholico lata, die-
bus 3 Augusti 1590, 12 Octobris 1597, 12 Septem-
bris 1598, 20 Decembris 1599, &c.

P R A E F A T I O.

ne appellantur in officinis, diversimodè tamen, pro multiplicibus vastissimæ hujus Urbis tractibus, ad cujusque Pharmacopœi arbitrium præparari; civium capitibus impendentia ex hæc pharmacorum inæqualitate ac instabilitate mala avertere omni operâ incubuerant. Scilicet hoc emolumentum insigne diu præstitit priscus ille Codex Medicamentarius, ut caveret ne, in eadem civitate, ejusdem remedii & actio dissimilis, & dosis incerta, imò & compositio Medicis minùs perspecta forent: effecitque ut deinceps, in quibuscumque officinis Parisiensibus, omnia medicamenta uniformi ratione, iisdemque ingredientium numero ac dosi componi securus esset Medicus, atque eadem, cum ægrotantium incolumitate posset præscribere.

Sed cùm temporum successu antiquæ illius Pharmacopœæ suppellex brevior reperta fuerit, ejusque exemplaria, unâ licèt & alterâ Editione* promulgata, rariora evaserint, novo Codici Medicamentario adornando incumbendum esse judicavit FACULTAS.

ERGO in explorandis, perpendendis, & invicem conferendis optimis utriusque Pharmaciae voluminibus diu multùmque sudatum est, unde quidquid, sive ad medicamentorum delictum justamque proportionem, sive ad processûs energiam simul & elegantiam pertinet, cu-

* Anno 1639, & Anno 1645.

P R A E F A T I O.

riose colligeretur. Laboris pensa selectis Doctoribus distributa sunt, qui mutua inter se jungendo studia, communesque impendendo labores, suas miscerent operas, sua invicem commo-
darent consilia. In frequentibus FACULTATIS comitiis proposita res est ac trutinata; singulorum Doctorum adnadmersiones, liturae, mutationes, additamenta in medium prolata sunt & examinata; tandem ne quid deficeret, expertissimos in tractandis medicaminibus, ad opus invitavit FACULTAS Pharmacopœos Parisienses, qui, omni adhibitâ sedulitate, præscriptas ab Ordine saluberrimo remediorum confi-
ciendorum formulâs fideliter experti sunt, operationibusque, quoties necessum fuit, diligentissimè repetitis, omnes encheireses ad prosperum facilemque successum deduxerunt.

SED ne ullus in medicamentorum simplicium delectu errori daretur locus, neve fucum facerent variae Simplicium species, quæ, licet ejusdem sint generis & nominis, diversas tamen obtinent virtutes; genuina, ordine alphabetico, præmittere statutum est discernicula rerum, quæ ex Animalium, Vegetabilium & Mineralium familiis depromptæ, vel Codicis Medicamentarii compositiones, vel formulas extemporeas ingrediuntur. Nec etiam omissa sunt gallica medicamentorum nomina, ut magis ac magis errori omnis præcideretur occasio. De-

P R A E F A T I O .

num ut per totum opus dispersæ res, suo quæque loco positæ facile reperirentur, additis indicibus Titulorum & Rerum necessariis, legentis commodo consultum est.

CUM verò omnibus Pharmacopœæ Parisiensis, tum anno 1732, tum anno 1748 editæ, exhaustis exemplaribus, de novâ Editione ageretur, Decano & FACULTATI placuit Codicem Medicamentarium denuò recensere, ut limatior in dies & perfectior exiret in lucem.

MATURO igitur Doctorum aliquot, ad id deputationum, examini iterum subjectus est, qui pro rei necessitate emendarent, rescinderent, amplificarent. Singulorum expositatae sunt & auditæ animadversiones. Plurimæ encheireses ad operationis scrutinium revocatae sunt, vel ab ipsis Doctoribus rerum pharmaceuticarum scientissimis, vel à Pharmacopœis Parisiensibus solertissimis. Nec etiam operi perficiendo defuerunt, experimentivse pepercerunt Pharmacopœi Prætoriani, qui, peculiari affectu non minus quàm sacramento FACULTATI devincti, varias medicamentorum conficiendorum rationes suppeditaverunt.

DIFFUSAM nimis officinarum pharmaceuticarum pompam ad necessariam suppellestem reducere omninò fuit animus, & ad com-

P R A E F A T I O.

positiones nobis usitatas restringere. Sed cùm Orbis universi veluti confluvium sit Lutetia, dum pro civibus plurimæ conscriptæ sunt formulæ, plura exteris familiaria, non omissa fuere præsidia, quæ in officinis Parisiensibus præstò esse convenit, ne, in restituendâ sanitate, curta videatur Lutetia peregrinantibus.

PORRO in recensendis medicaminibus, plures rejectæ sunt compositiones, omninò obsoletæ, aut inutiles, aut ingredientium repugnantia absurdæ, superflua rescisa, omnia, quantum fieri licuit, ad simplicitatem revocata sunt. Aliquid utique venerandæ concessum est Antiquitati, præsertim in rebus longo usu & experientiâ confirmatis, quas leviter immutare non libuit. Hinc est quod suus Theriacæ, Mithridatio, &c. &c. servatus sit locus. Aquæ etiam stillatitiæ simplices admissæ sunt, quæ, hierno præsertim tempore, herbarum recentium penuriam aliquo modo supplerent. Sed illis præsertim Aquis concessa est venia, quæ plantarum, ex quibus educuntur, odorem aut saporrem, adeoque virtutem aliquantulum retinent, & eâ conditione ut quàm sapissime renoventur.

Hic fortasse aliquod præparationes occurrent, quæ propter ingredientium quorundam inter se pugnantium farraginem, censoriâ virgulâ notandæ videbuntur. Sed cùm illæ

P R A E F A T I O.

celebritatem aliquam apud populum & magnates obtinuerint; earum compositionem genuinis artificibus committere satius ductum est, quàm eas inter agyrtarum manus relinquere. Id nempe Humanitatis debilitari concessum est, ut cives nostri apud Pharmacopœos reperirent illa medicamenta, ritè & fideliter præparata, quæ, si deficerent in officinis, à circumforaneis adulterata & perversè composita compararent, eoque avidius perquirerent, quòd, etsi notissima, pro Arcanis vendicarentur. Omnibus namque cordatis perspectum est quo ardore appetantur Arcana sic dicta remedia: & è contrà quam citò vilescant mirabilia illa & tantopere decantata Secreta, statim atque illorum descriptiones ac formulæ publici juris fiunt.

CAETERUM si quis, ad Codicis hujus Medicamentarii normam medicamenta præparando aut componendo, scopum primâ vice fortè non attingat, id non formulæ vitio tribendum esse statim credatur. Facilius est enim arrogantibus verbis & procaci libertate Legem arguere, quàm omnem adhibere diligentiam ac sedulitatem, aut omne scrupulosæ fidelitatis ac docilitatis artificium impendere, quò præscripta succedat operatio. Atque nihil frequentius occurrit in officinis Pharmaceuticis, Chymicisve *Laboratoriis*, quàm operationes, ut præscriptæ sunt, à solerti & docili artifice peractas optimè succedere; dum è contrà indocilioribus com-

P R A E F A T I O.

missæ manibus formulæ, vel inconcinnitatis vel impossibilitatis arguantur. Itaque Pharmacopœi, qui Medicorum & ægrotantium fiduciam mereri ac obtinere ambiunt, omnem diligentiam adhibere debent, ne à præscriptâ lege quàm minimùm aberrent; siquidem perito cuilibet artificio probè notum esse debet operationis cuiusque, siue galenicæ, siue chymicæ, successum & elegantiam ab exiguâ sæpius attentione ac encheiresi dependere.

INTERIM quærat hîc nemo promptuarium universale; operis hujus præcipua cura versatur, ut in tantâ, quanta est remediorum multitudine, utiliora tantùm & usitatiora proponantur, recentioribus Medicis experta medicamenta veteribus intermiscendo; extranea indigenis.

SED nec illud est hujus Pharmacopœæ institutum ut prohibeat ullis aliis uti, aut Pharmacopœorum officinas ullis aliis instrui remediis, quàm quæ hîc describuntur. Idèd solummodo adornata est, ut omni tempore, remediorum ritè & uniformi methodo paratorum justa sit copia, quæ ad manum prompta, à Medicis commodè & securè præscribi possit, servatis semper, quæ quibusque Medicis competunt, jure ac libertate quæcumque libuerit ex tempore præscribendi.

P R A E F A T I O .

Sic igitur seriò meditarum, perfectiùs elaboratum atque recognitum, ab omnibus Gal-
liæ Medicis & Pharmacopœis exoptatum hoc
opus, omnium consensu prodit, Ægrotantibus
incolumitatem, Medicis securitatem, Pharmaco-
pœis constantem regulam & legem
allaturum.

